

Maria, Maienkönigin

Wie an alda Brauch om 1. Mai die Proazeller auf dan Wonnemonad Mai eischdümmnd

Damm äna g'feälld dar Brauch üwerhaubd nie, da meisda Laüd oawer g'feälld er sou richdich; die lauscha ganz oadähdich dana Liader.

Dar öarschda hoad in dr Noachd aufn öarschda Mai beim Maidanz zu lang in dr Boar rümmgheängd odr zu lang irchendwu midm Mädla rümbosierd. Sie höan alsou noch Schloafbedoarf unn wölla nie geweckd war, schua goar nied früh um 6 Uahr, weil sa groad öarschd neis Bedd gegrocha sen.

Die annera duan die Musik, die doa vo irchendwu harkünnd, mid am fromma Wunsch o die Goddesmuaddr verbind. Für di iss die Musig fasd wie a Gebad, wie a musikalischa Maiodaochd.

Ich Reid vo dam Brauch, dass om 1. Mai früh um 6 Uahr die Proazeller Bloasmusig dan Moarcha unn die gläubicha Proazeller mid Marienliader weckd unn sou dan Daoch begrüßd.

Unn sie schbiela alla Marienliader, die die Laüd so vo dr Kirch har kenne:

- Maria, wir dich grüßen, oh Maria hilf...
- Maria zu lieben..
- Meerstern, ich dich grüße...
- O himmlische Frau Königin, du aller Welten Herrscherin...
- Maria, Maienkönigin, dich will der Mai begrüßen...
 - Segne du Maria, segne mich dein Kind,
 - ...unn noch viela annera Liader.
 -

Es iss schwiarich, rauszufinna, wann dar Brauch ogfanga hoad. Ich ko mich nou erinnern, wie ich die zum örschda Moal ghöard hoa. Dou hao ich nämlich die Mama gfreähd:

- *Wu künnd dann die Musig har? Daos is sou nouh. Schbiele die bei uns im Houf?*

.

Unn die Mama hoad gsaochd:

- *Na, die schbiala dou douwa ouwerhalb vo dr Pfülf's Marie; daswacha klingd daos sou nouh .Die begrüäða dan Monad Mai.*

Doas muass sou üm 1948 – 1950 rümm gewasa sei, weil ich die Liader all gekennd hao ; ich bian om Sundich ümmer nei die Frühmäss unn neis Amd ganga unn wann om 1. Mai die Musiganda gschbielid hönn, do woar ich gleich hellwaach. Ich woar dou zu dara Zeid an ganz a fromma Bua; Ministrand woar ich a noch. Mid Marienliader geweckd woan, gleich zwämoal nei dr Kirch ganga – doas woar äfoach mei Lawa daomoals.

Mir om Groddawach (Grottenweg) woarn oawar a in a besunnera Laoch. Die Musiger hönn ouwerhalb von dr Pfülf's Marie gschbielid, ouwerhalb vom Schillers Heiner seim Haus und äbbes lings vom Adolf seim Bienahaus, doas haüd noch schdeahd und doas mr vo dr Bohstroass aus guad g'sah ko. Die zwä Wohnhäüsr schdeahn heut niammr; wacha dr Umgehungsdroass hön sa wäggemüasds.

Dou douwa hönn die jeds Joahr om örschda Mai ganz Proazella a groaßa Fräd gemaochd, dann mer hoad die Musig üwersch ganza Doorf ghörd, douwa om Bohhouf genau sou wie in der Zollberchsiedlung oder im Ünnerdoorf, wammer die Fensdr auf dr richdicha Seida aufgemaochd hoad, alsou in dar Richdung, wu die Muusik harkumma is.

Bis 1983 hoad die Bloaskabella Proazella dou douwa gschbielid könn, dann muassda sa dan Bladz wächsel, weil endlich die Umgehungsdroass gebaud wonn is – die woar schua mei als 20 Joahr vürhar in de Köpf vo a boar Bloaner gebloand woarn. Dann sen die Musiger umgezoacha zum Dreähhoammer om End vo dr Sunnleida-Schdroass. Unn dou schbiala sa a haüd noch.

Dou hoad's noch an zwädda Brauch gawa – unn dar ghörd zum Musigerlawa: Wann die Musiger feddich woarn mim Schbiela, dann hoad sa die Pfülf's Marie zum Frühschdüg eigelaoda. Uff zwä Ziammer woarn sa all verdeäld, dou die Äldera, dod die Jüngara.

Es is nadürlich ni beim Frühstück allä gebliawa; dann hoad's noch an Verdauungsschnabs (odr a zwä,...) gawa, un a Schöbbla ouwa druff. Doudazu noch Zigarrn un Zigaredda, dass mer sich fast geichaseidich niammr gsahn hoad. Oawer die Marie woar doas gewohnd; iahr Mo, dr Andon, woar amoal sou äbbes wie dr Bedriebsleider vo dr Zigarrnfaobrig beim Koarles Bäck ouwa din, und dan Mo hoasda nie ohne a Zigarrn zu rache gsahn. Wie sou an alda Guadshärr isser ümmer bei uns om Haus vobeistolziard.

Mer muass wiss, dass die Sieglinde, die äna Dochdr vo der Pfülf's Marie, mid am Zigarra-Zigaredda-Rauchwoarahändler mid am groaßa Gschäfd in Friedberch (Friedberg/Taunus) verheiad woar, und dar hoad es sich ni nahm loass und is om 1. Mai ümmer mid em Haufa vo Schdanga vo Zigaredda ogerügd und hoad die Musiger auf sei Aord belohnd.

Mancha vo dara Musiger sean öarschd schbeäd vo dr Marie hämganga, lang noach' m Amd in dr Kirch, und dann hönn sa sich a no so laud unnerhalla, dass Läud, meisdens Eisaböhner, die a Noachdschichd hinner sich hadde, unsanfd aus'm Schloaf gerissa woarn sean. Die hönn sich dann nadürlich a a weng geärcherd.

Es is a vürkumma, dass mancha vo dara Musiger die ganza Noachd nou nias gschloaffa hadda, weil sa noach'm Maibaumaufschdella om Daoch davüar noch Musig gemaochd hönn, dann bei dam äna oder annera Musiger dahäm noch a Väsber neighawa hönn, und dann woar die Naochd rümm unn es hoad g'häße:

- *Auf geähds! Es geähd nauf die Wengerda zum Mailiaderschbiela!*
-
- Sou isses hald, doas Musigerlawa!

Noach em Doad von dr Pfülf's Marie und dam Ümzuch zum Wendehoammr o dr Sunnleida hoads aob 1984 aochd Joahr lang das Frühschdüg beim Walter „Laobber“ Betz gawa. Oawer dar hoad dann a niammer gekönnd.

Dann hoad die Frau vom Vorschdand un Dirichend Josef Ruppert, en Sohn vom Schreiner Hennerles Karl, daos Frühschdück übernumma.

Üm die Joahra 2010 rümm hönn a boar eifricha Musigerfrau daos Frühschdück im Musikheim zuberädd.

Woas is aus dam Brauch woarn? Doas Marialiader-Schbiela find ümmer noch o dr gleicha Schdell schdaodd. Ämoal hönn die Musikr noach 'm Marialiaderschbiela a a boar Märsch un Bolgas vüar dr Kiarch zur Fräd vo all dana begeisderda Zuhörerer g'schbiel.

Im Joahr 2018 hönn die Proazeller Musiganda zsamm mid dr Höschder Bloasmusig auf dr Ersatzfäahra – wacha em Naübau woar die Brügga noach Höscht in Gemünna eigerissa woarn – Unnerhaltungsmusig g'schbiel.

Seid a boar Joahr mehd Andrea Kraft, die Fra vom Dirichenda Jürgen, mit viel Liab daos Frühschdügg .

Die Musiger sean wieddr auf zwä Ziammr verdeäld – aower gerachd wüard niammer.

Marktheidenfeld – Langenprozelten, 30. April / 1. Mai 2024

Heribert „Héry“ Felbinger

–